



中國大事記



民國四年七月十八日

●熱河隆化縣移治黃姑屯……熱河都統。以隆化縣現在縣治。偏於北隅。於行政司法事宜。諸多窒礙。加以衙署近河。時虞衝塌。擬移治於黃姑屯地方。咨由內務財政兩部會核。呈請照准。

●教育部呈准各省設立法政講習所……大總統前頒教育綱要。內載法政學校每省設一所。以養成自治人才為主。科目偏重自治。程度略遜專門。畢業後不得與以預高等文官考試及充當律師之資格。其各省舊有之專門法政學校。暫勿擴充班次。並說明由教育部妥定辦法。通咨各省施行。茲由部擬定通行各省。不得添設公私立法政專門學校。其舊有者。暫勿擴充班次。至每省設一所之法政學校。則請定名為法政講習所。另行擬定科目規程。呈請公布。奉批照准。

29329

同 十九日

●農商部呈籌擬督促地方實行造林辦法……農商部為提倡造林起見。籌擬辦法兩項。其一責成各道尹。就地籌設苗圃。隨時採購樹種。分布各縣。按期種植。其一通飭各省農會。遵照森林法第三章各條之規定。承領官有荒山。切實造林。規定省縣承領官荒山地。應各籌設苗圃一區。省農會須有百畝以上。縣農會須有三十畝以上。選擇各該地適宜樹種。養成苗木。以供實行植樹之需。兼備分給造林之用。呈請大總統鑒核。奉批照准。

●司法部呈准死刑案件呈報辦法……司法部前奉大總統交諭。以近來死刑案件。向不呈報。辦理殊屬疏漏。嗣後擬處死刑各案判決確定後。京師由管轄檢察長申達司法部。外省由高等檢察長申達行政長官轉咨司法部。經該部隨案呈請。俟奉批准。再由該部飭下所屬執行。應即由部妥議呈請通行等因。當由部遵議。呈請嗣後普通司法衙門擬處死刑各案。判決確定後。均須繕錄詳細供勘及判決書。其覆判核准及上訴審駁回案件。並須

293³⁰鈔錄原審判決書。報由本部呈請。除京師由管轄檢察長逕詳外。外省由高等檢察長司法籌備處處長或都統審判處處長詳由該管行政長官轉咨。至本部呈請辦法。擬參照舊例。凡奉令交辦及專關重大案件。審判確定後。據報到部。即行專案呈請。其他案件。均就報到先後。隨時彙案呈請。仍照向例。至多以十案為限。均俟批准後由部分別咨飭執行。惟不復沿用前法部分省彙報辦法。以免稽延。又除奉令交辦及事關重大案件仍附鈔全判呈報外。其他案件。祇節錄犯罪事實及原判罪刑呈報。其判決內容。如有未盡妥協之處。仍隨案聲敘。以備查核。奉批如擬辦理。

同 二十日

●裁撤鎮江鎮守員缺

同 二十一日

●以京兆為特別區域作自治模範並任命昆東王達籌辦京兆地方自治事宜……令曰。昔孔子觀於鄉而知王道之易易。亦以治國之道。始於一鄉。必綱舉目張。乃於詳密之中。得易簡之理。是以周公設官。逮於比閭族黨。管子施政。必自軌里連鄉。東西各國地方自治之精神。本吾國三代以前所固有。降至漢代。尙重鄉亭。六朝以來。師心變古。良法美意。蕩然無存。以縣令一人之身。坐理數十萬戶口。但能於緝捕聽斷催科等事。奉行勿違。已為上選。至求東西各國所謂教育行政等。非惟不暇。抑亦不能。予曩在前清。創設地方自治於天津。以次及於各省。

根蒂未固。遂遭改革。厥後暴民用事。良懦藏身。改絃更張。以息狂焰。勢非獲已。夫豈素心。京兆為全國所具瞻。當定為模範特別區域。以作自治模範。經飭政事堂另議修正京兆官制。務做西國都市之政。東鄰町村之規。心摹力追。日就完備。京兆尹事務繁重。創辦之始。需員助理。存記道尹昆東。高密縣知事王達。著開缺籌辦京兆地方自治事宜。商同京兆尹分期立限依次施行。其矢以誠心。濟以毅力。將所謂福利政策者。庶幾遇之。予日望之矣。此令。

●前四川巡按使陳廷傑因案被押……陳廷傑前在四川巡按使任內。有肅政使糾參其受賄枉法各款。當派員赴川查辦。現陳進京覲見。此案業經查明。大總統令發交平政院審理。由院傳案訊問。當發交步軍統領衙門看管。俟傳集人證。再行質訊。

同 二十一日

●申令京師設模範小學……令曰。國民教育。以小學為基礎。觀於小學兒童之態度。而可以規國之興衰。為小學教員者。兼父母師傳之職。故當世重之。異於常流。吾國教育。本未普及。重以改革。廢學尤甚。且辦法分歧。精神缺乏。予在天津時。因小學班級參差。進步遲滯。特設模範小學一所。頗資倡導之力。京師為全國人事所觀瞻。應迅設模範小學。為各省表率。所有建築開辦等經費。本大總統自任捐發。以樹風聲。務使學校如林。庠序盈門。有厚望焉。此令。

●財政部裁汰部員……財政部原設額缺一百二十五員。現連行

走及辦事員。共計二百二十九員。除四員已辭差外。爲樽節國用起見。裁汰六十四員。計每月可節省薪俸八千餘元。

●司法部呈准民刑事訴訟案件。摘由彙報辦法……大總統前申令司法部及各省巡按使。按月呈報法廷受理案件。司法部特擬定民刑事訴訟案件摘由彙報辦法呈核。奉批照准。

●司法部呈嚴定法官資格並擬訂法官預保辦法……大總統前申令司法部嚴定法官資格。茲由部擬訂簡任法官資格。簡任法官預保辦法。薦任法官資格三種。呈核。奉批准如所擬先行試辦。

同 二十四日

●發銀五萬圓賑江西水災……令曰。據江西巡按使戚揚電稱。贛省自七月初旬。大雨如注。山洪暴發。冲毀城垣。平地水深丈餘。淹斃人口無算。萬安泰和吉安等處。適當其衝。吉水臨江新淦豐城淦江南昌新建各縣。均因上游水勢。建瓴而下。同遭波及。此外如上猶零都南康會昌分宜豐奉新安義永修。被水情形。亦均甚重。雖經派員籌款。先放急賑。然災區深廣。接濟爲難。請予頒帑以資賑恤等語。該省自遭前年兵燹後。民生彫瘵。迄今未蘇。此次驟被水災。致豫章廬陵數十縣地方。盡成澤國。天降之厄。民何以堪。著財政部迅發銀五萬元。并由本大總統捐銀五千元。尅日匯寄。交該巡按使遴派委員。趕赴災區。酌量情形。分別散放。以恤災黎。此令。

同 二十五日

●令法官懲戒法尙未頒布關於法官懲戒事件暫准用文官懲戒法辦理

同 二十七日

●湖北兵工廠失慎……湖北五金兵工廠。本日因火藥炸燃失火。轟燬屋數間。炸傷工人七名。

●廣東花縣匪亂……廣東清遠花縣地方。向有百二友匪。本日。匪衆乘花縣官兵出剿。突然攻入縣城。焚燬縣署。肆行劫掠。經駐城軍警悉力抵禦。陣斃匪徒多人。始行擊散。

同 二十八日

●鹽務署裁汰人員……鹽務署前奉令裁汰冗員。特擇事務稍簡者裁汰十三員。計每月可省薪俸二千六百餘元。

●各省風雨爲災……江蘇浙江等省。於本日均遭颶風。毀屋覆舟。傷人無數。沿海一帶居民房屋。並遭潮水漂沒。死傷達數萬人。北部山東奉天吉林黑龍江等省。亦於日內均遭大雨。江水泛溢。衝毀堤防。漂沒屋宇田禾。災情極慘。鐵路軌道。多被衝壞。又雲南開化蒙化等地。近日亦遭水災甚重。

同 三十日

●河南蝗災……河南沈邱新野泚源等縣。先後發現蝗蝻。當由巡按使通飭各縣知事撲捕。

同 三十一日

●公布高等小學校令……令見法令門。
●公布國民學校令……令見法令門。

29332 ●調任韓國鈞爲湖南巡按使……陶思澄進京覲見。未到任以前。由嚴家熾護理。

●特任李兆珍爲安徽巡按使……未到任以前。由徐鼎康護理。

●農商部呈准定清明爲植樹節……農商部爲提倡植樹起見。呈請以每歲清明爲植樹節。京師由大總統諭定地點。特植嘉樹。

京兆尹各巡按使都統暨道尹縣知事縣佐。均如期舉行。奉批照准。

八月 一日

●大總統誠勉羣僚……大總統府政事堂交片京內各部院衙門暨函寄各省將軍巡按使等機關。略云。國務卿面奉大總統諭。仲虺之誥曰。兼弱攻昧。取亂侮亡。今歐洲人亦謂野蠻或半開之國。宜由文明人取而代治。以爲天職。每一念及。毛骨悚然。吾果無弱昧亂亡之象。誰得而兼之攻之取之侮之。然試閉目一思。軍隊之龐雜。吏治之廢弛。水旱之災荒。人思權利。罕有公心。厝火積薪。自謂已安已治。其能知自己之實力明世界之大勢者幾何人。其地方盜賊絕跡官吏發憤爲雄者幾何處。不謂之弱與昧得乎。不謂之可亂可亡得乎。或謂廣土衆民。殆無亡理。不知朝鮮方里。比三島何如。近閱日本報紙。謂支那雖成空前之大革命。而其內容之腐敗墮落。實與前清無異。賄賂之公行。賭博之熱盛。眞爲可驚。新國氣象。毫不存在。局外旁觀。意在言外。試思甲午庚子兩役。何嘗不言臥薪嘗膽。而作僞日拙。以迄於亡。但清之亡也。亡朝而非亡國。今之滅國新

法。亡其語言。亡其文字。並亡其人種。波蘭越南之史。不可不知。近自中日交涉。全國恐慌。若事過境遷。仍復泄沓。亡不旋踵。實可預言。彼東西列強。百事修明。何等氣象。返觀吾國。則蕪穢不治。偷惰苟安。南滿實權。所存無幾。外力至臥榻聲鼾。而猶上下恬嬉。不知亡之將至。予老矣。受諸前清而亡諸我躬。其甘心乎。救亡之道。惟在自責。苟有弱昧亂亡之一點。必痛除之。勿謂可以禦暴民者。即可以對外國。勿以復前清末造之况爲已足。勿以保各國均勢之局爲即安。來日大難。寸陰是競。孟子云。生於憂患。死於安樂。兵法云。置諸死地而後生。孤舟大海。非從容雅步之時也。昔楚莊王日討國人而訓之。告以民生之不易。禍至之無日。心所謂危。涕泣而道。其毋忘五月七日之事。去矜去惰。勇猛精進。挽回氣運。以保我子孫黎民。傳曰。能知亡。斯不亡。願共勉之。

同日

●內務部呈准黑龍江省克山設治局改設縣治……黑龍江省克山設治局。舊隸訥河。距縣三百里。東鄰通北。南界拜泉。西迤莽廂公。北抵龍門鎮。均在百數十里之外。計地一百八十餘井。事務頗繁。經黑龍江巡按使朱慶瀾據龍江道尹並該處人民先後詳稟。咨請內務部轉呈改縣。當由部呈請於四年下半年度改爲克山縣。列入三等縣缺。奉批照准。

同日

●准廣西南寧道屬安定等九土司改流置縣……廣西全省幅員。

當有明時代。大半係屬土司。土官定為世職。迨前清時。乃逐漸改土歸流。設立縣治。其因仍未改者。尚有四十餘屬。土官世守其土。治理未諳。甚或席其淫威。恣為貪暴。又經先後予以撤任。改派漢員。駐紮境內。代行其職務。名為彈壓員。現計各土司之派員彈壓者。已居十之八九。而土官世襲之例。早經破除。惟彈壓職權輕微。土司壤地錯雜。因沿不變。終不足以言治。廣西巡按使張鳴岐呈請以南寧道屬武鳴縣承審之安定、白山、古零、興隆、定羅、舊城、都陽、七土司隆安縣承審之歸德、果化、二土司為始。改流置縣。以順輿情。九土司境內。以紅水江右江兩水為其南北兩部幹流。擬就水流區域自然形勢。分置三縣。紅水江北。將安定土司全屬與都陽土司本治境地。及所屬豆也墟地。興隆土司所屬之古河等城頭地。並田南道屬恩隆縣轄之大化等處地合併。東至忻城土縣。南至那馬縣。西至恩隆縣。北至永順土司及河池縣為界。幅員一萬一千方里。設置一縣。以安定土司治為縣治。即就原有衙署為縣署。名之曰都安縣。紅水江東南。將白山土司本治境地。及所屬上旺下利那馬等處地。古零土司本治境地。及所屬上段下段博學等處地。興隆土司本治境地。及所屬六合自雞等城頭地。並恩隆縣承審之下旺土司所屬之首城頭等處地合併。東至上林縣。南至武鳴縣。西至那馬縣。北至現議設置之都安縣為界。幅員約六千方里。設置一縣。以白山土司治為縣治。即就原有衙署為縣署。名之曰隆山縣。右江流域。將歸德果化兩土司全

境。及白山土司所屬丹良等城頭地。都陽土司所屬下段地。舊城土司本治境地。下旺土司插入地合併。東至現擬擴充境域之那馬縣。南至隆安縣。西至上林土縣。北至恩隆縣及下旺土司為界。幅員約六千方里。設置一縣。以果化土司治為縣治。即就原有衙署為縣署。名之曰果德縣。以上三縣。仍隸南寧道屬。至定羅土司本治境地。與所屬山東苗地。均與那馬縣毗連。白山土司所屬之思黎城頭地。古零土司所屬之上段三處地。舊城土司所屬之賁川都勉等處地。興隆土司所屬之龍口等處地。與武鳴縣屬飛入地。均插花於那馬縣界內。因那馬縣疆域褊小。不足百里。將以上地方。撥歸所轄。又古零土司之那學三隘兩城頭飛入上林縣境。距上林縣城僅十餘里。與古零隔大名山脈。周圍皆上林縣轄地。亦割併上林。以免甌脫。並將都安縣。定為二等缺。隆山果德兩縣。定為三等缺。奉批照准。

同日

●廣西巡按使呈准廣西人民自由開採錫鑛……廣西向多錫鑛。惟率皆零星散布。並無大段之鑛區。與豐厚之鑛床。不能照鑛業條例辦理。廣西巡按使。為裨益人民生計起見。呈請准將所有錫鑛。聽人自由開採。並准商人自設公司。收買運銷。免其出口稅。奉批准暫行試辦。

●署廣西融縣知事楊道犯賊處死刑……楊道違法受贓。經廣西高等審判廳訊明。褫奪公權。張巡按以其核減理由。似欠充分。呈請照官吏犯賊條例懲辦。奉令。改處死刑。

同日 五日

29334
●令制定官吏升轉年限……令曰。昔孔子與子張論政曰。居之無倦。行之以忠。使先存一五日。京兆之心。則職務尤多曠廢。是以唐虞考績。必及三年。漢時令長得人。往往增秩賜金。不輕遷調。以致風俗淳美。吏民畏懷。非偶然也。民國初元。銓法破壞。吏少靖共之意。人懷僥倖之心。京外各署長官。每易一人。曹椽爲空。文書積壓。朝三暮四。靡所適從。不知各專務官。本不隨長官爲進退。故人心安定。政局不至動搖。今文官考試任用各法。已令政事堂飭局修訂。除各省迴避本籍人員。仍須隨時辦理外。均應制定升轉年限。俾各久於其任。以重公職而絕私圖。庶日計不足。歲計有餘。人人各盡其長。以副久道化成之治理。有厚望焉。此令。

●全國水利局呈請各省籌設河海工程測繪養成所……全國水利局總裁張謇。以治水須先測繪。呈請各省籌設河海工程測繪養成所。並將各省原有測繪傳習所。更定名稱。釐正學科。以養成測繪人才。奉批照准。

●濮陽黃河決口……濮陽河工。甫經合龍。近因連日風雨。河水驟漲。習城地方。決口數十丈。當由卸任督辦徐世光。電飭搶護。並派員馳往詳勘。

同日 六日

●教育部呈訂地方學事通則……教育部因義務教育施行程序內列第一期應辦事項第二款擬訂地方學事通則。特擬具通則草案。

呈請核定。當奉大總統批准公布。(通則詳法令門)

●財政部呈准川省酌設關監督及歸併常關……川省舊有常關七處。除夔關成都兩處業經任命監督外。其寧遠雅安打箭爐永寧慶元五處。均暫由四川財政廳管轄。現財政部據該省財政廳詳請。呈請將寧遠雅安兩關。設置監督。並將打箭爐歸雅安關兼管。永寧慶元。歸成都關兼管。奉批照准。並任吳士椿爲寧遠關監督。洪鑄爲雅安關監督。

●中日青島海關交涉解決……青島海關問題。迭經我國派員與日本交涉。業已妥協。由總稅務司安格聯。代表我國政府。與駐京日本公使日置益。訂約四條。本日在京簽字。據日本外務省發表約文共四條如左。

關於青島中國海關再行開辦稅務並日德戰爭之結果。該稅關現在日本軍政所轄德國租界地域內。執行稅務之規約。

第一條 互約中國海關得在青島再行開辦稅務。

第二條 一千八百九十九年四月十七日中德兩國代表在北京簽字之青島稅關修正條約。宜按照本規約之主義。凡事關必要之處。其所有德國字樣。悉刪除之。特改用日本字樣。

以代德國字樣。而關於青島中國海關之再開。並其規則及手續。中日兩國間。俱認爲有效者。

第三條 從前總稅務司所管青島中國海關之公文書類。並海關所有公款及其他一切附屬財產。被日本軍官奪佔者。宜一律還付中國總稅務司。

第四條 日本政府宜將日本佔領青島海關以至該海關還付中國之日日軍所徵收稅款。按照一千九百零五年之中德修正條約。扣留純收入總額之二成。其餘之款。則還付總稅務司。

●吉林模範監獄囚犯反獄：吉林省城模範監獄罪犯七百餘名。於本日晚間。全體譁變。希圖越獄。將看獄兵槍械奪去。轟放示威。當道急調大兵圍剿。並在城內下令戒嚴。各犯盡力抵抗。縱火焚燬獄室。相持一晝夜之久。至七日。獄內槍彈告盡。始被攻入。當場格斃囚犯五六十人。擒五百餘人。分別處刑。獄中員役及未經與謀之犯人。被殺者數百人。兵警死傷亦衆。

同日

●司法部呈准法官懲戒事件暫由文官懲戒委員會兼辦：司法部以法官懲戒事件。前奉大總統申令暫准用文官懲戒法辦理。呈請法官懲戒機關。亦准用文官懲戒委員會編制令。即由現設之文官高等懲戒委員會兼任。奉批照准。

●吉林添設鎮守使：吉省西連內蒙。東鄰朝鮮。北接俄國。為邊防重要之地。政府為固邊起見。除西邊已添設吉長鎮守使任命裴其勳充任外。特添設延琿寧河兩鎮守使。以固東北兩邊。任命高鳳城徐世揚充任。

同日

29335 ●撥銀十萬圓賑江蘇風災：令曰。據江蘇巡按使齊耀琳先後電稱。上月二十七八日。颶風為災。所有濱江沿海一帶受災情

狀。以上海常熟太倉寶山崇明江陰南通海門如皋贛榆等縣為重。崑山南匯奉賢金山川沙靖江鹽城東海等縣次之。廬舍船隻。禾稼人口。均受損害。江陰贛榆兩處。河隄圍岸被沖。太倉松江海塘。亦間有坍塌者。業已冒險施工。趕緊搶護。幸免潰決。除距離較遠暨海外各島尚在查勘未經報告外。所有受災之區。擬請撥款賑。並備塘岸搶險之用等語。該省上年江南歉收。

江北風雹蝗蝻。迭為災害。民氣至今未復。此次颶風暴雨。達旦通宵。天降凶災。實所罕覯。哀我黎庶。何以爲生。著財政部速撥銀十萬圓。並由本大總統捐銀一萬圓。尅日匯寧。交該巡按使分撥各縣遴委委員趕放急賑。所有隄岸海塘險工。即責成地方官及在工員役。於已被沖者。設法堵築。未被沖者。實力守護。以免再滋危險。並將各海島受災區域。切實調查具報。總期惠能普及。款不虛糜。毋負國家憫恤民生之至意。交內務財政兩部查照。此令。

同日

●撥銀二萬圓賑山東膠縣水災：山東膠縣。連遭山水海水。城鄉被災甚重。由巡按使呈請賑撫。奉批撥銀二萬圓。

●財政部呈訂所得稅第一期施行細則：自去年一月所得稅條例公布後。施行細則。迄未擬定。茲財政部以此項稅法。為良好之稅源。亟應設法辦理。特擬定第一期施行細則十六條。先從官吏及大商業等項入手。於民國五年一月起一律實行。呈請大總統鑒核。奉批照准。（細則見法令門）

29336

同 十日

●申令各省地方長官通治溝渠量植林木……令曰。據全國水利局總裁張謇呈稱。各省興墾之區。必先通治溝渠。量植林木。以立水利基礎等語。水有所歸。乃不爲害。愚民狃於近利。不知遠圖。或曲防以病鄰。或貪地而障水。一遇霍潦爲患。川壅成災。工賑兼施。所損已鉅。該總裁所陳各節。懲前毖後。洵爲切要之圖。嗣後凡新墾之地。應通測地勢高下。及旁近各地面積。不分畛域。不論官私。於宣洩之途。交通之路。一一先行開治。卽其餘已經報墾處所。亦應疏通溝渠。以資灌溉。培植林木。以固隄壑。著內務農商兩部。會同該局。通行各省地方長官。督飭遵辦。盡心民事。以救天災。是所厚望。此令。

●申令保護各省寺廟財產……令曰。據內務部呈稱。各省寺廟財產。爭訟糾紛。請明令保護。以維宗教而資信守等語。民國肇建。於法律範圍以內。均有信教及財產之自由。惟改革之初。土豪劣民。往往藉端侵佔。控訴之案。紛紜不決。關係於僧侶廟產者尤多。嗣經該部規定寺院管理暫行規則。藉示限制。而訴訟舊案。往往纏抗不休。此等廟產。或由於教徒之募集。或由於人民之布施。其所有權未經讓與以前。當然屬諸寺廟。應由該部通飭地方官吏。對於守廟財產。責成該管官切實保護。除僧侶熱心公益自願捐輸仍准稟明立案外。均應嚴禁侵佔。違者依法治罪。關於廟產構訟事件。秉公清結。毋任宕延。其在該部寺廟管理規則公布以前。事實業經解決。權利早已移轉。

自當不溯既往。所請舊案。仍查明當時讓與之教徒。由該部量予褒揚。並准於施捐地方。勒石表彰。以昭平允。總之保護民間財產。爲地方官應有之職權。國家一視同仁。斷不容營私罔利之徒。橫加蹂躪。將此通令知之。此令。

同 十二日

●撥銀三萬圓賑奉天水災……令曰。據奉天巡按使張元奇電稱。新民縣地方。於七月二十九三十等日。迭次大雨。西北兩壩。均經漫決。全街水深七八尺。縣署及民房商鋪。多被冲毀。傷斃人口無算。四鄉被災者。竟至一百三十餘村屯之多。盤山縣亦以連日大雨。遼水暴漲。沿河之一二三等區地畝。被淹殆盡。房屋大半坍塌。此外瀋陽遼陽海城營口彰武興城雙山鳳城寬甸黑山等處。亦均先後詳報水災。現飭財政廳籌撥款項。趕辦急賑。第災區既廣。來日方長。非有數萬元。不足以資接濟。擬懇援照浙江江西等省。酌撥帑項。以恤災黎等語。該省頻年荒歉。戶鮮蓋藏。茲又天降霖霖。遼河泛溢。致遼陽道屬各該縣。俱成澤國。哀我黎庶。昏墊何堪。著財政部迅撥銀三萬圓。並由本大總統捐銀三千圓。尅日匯奉。交由該使遴員分赴災區妥速散放。毋任流離失所。以副本大總統軫念民生之至意。交內務財政兩部查照。此令。

●撥銀三萬圓賑河南水災……令曰。據河南巡按使田文烈先後電稱。該省新安洛陽鞏縣濟溼沁陽許昌等處。因大雨連綿山水暴發。東北洩河。西北同河。同時漫溢。民隄相繼決口。秋禾

淹沒。房屋冲塌。其餘電報不通之處。尚有未經報到者。已分別確查等語。該省連年兵燹。塗炭已深。民氣未蘇。偏災復遭。哀我黎庶。疾苦何堪。著財政部速撥銀三萬圓。並由本大總統捐銀三千圓。尅日匯交該巡按使。遴派委員。馳往被災處所。分別賑濟。以拯民生。交內務財政兩部查照。此令。

●交通部查復京張鐵路弊端申令切實整頓路政……令曰。交通部呈查復京張鐵路弊端。並就礦煤車票營私勒索四項。分別整理各情形。該路紀綱敗壞。無可諱言。應責成新任局長劉式訓。淬厲精神。破除情面。將一切積弊。摧陷廓清。前局長關冕鈞。辦路多年。於路員泄沓。市僧把持。未能毅然改革。咎實難辭。業已撤差。准從寬免議。其餘不職各員司。如呈分別察看。開除降調。以示懲儆。現在財力艱難。鐵路要政。上益國帑。下利商民。關係至鉅。固宜注重技術。尤應慎選廉能。准如所議。由該部切實施行。毋得仍前玩泄。是爲至要。此令。

同 十三日

●全國師範校長會議開會……教育部前爲統一全國師範教育起見。特召集全國師範校長會議。本日在京開會。

同 十四日

29337 ●申令釐定鐵路郵電各局職員任用辦法……令曰。鐵路郵電。關係國家交通行政。辦理人員。職務綦重。從前設局之始。以事屬創舉。未遑制定專章。且成立先後。各有不同。事取因地因時。以至行政用人。諸從簡易。甚非所以昭慎重也。現鐵路

郵電各政。均已粗具規模。在事各員。責任尤重。亟應先行釐定畫一任用辦法。以符規制而專責成。除鐵路郵電各局。向由聘雇委派之技術管理各項人員仍照向例辦理外。所有關於路政之路政司長。向兼鐵路督辦。應定爲簡任。鐵路各局局長。均改爲監督。一例定爲簡任。其處長總管及廠長所長各大站站长等之職務繁重者。均定爲薦任。屬於郵政之郵政總局。現應酌設督辦。應定爲簡任。屬於電政之郵傳司長。向兼電政督辦。應定爲簡任。電政管理局監督。及重要地方之甲等第一級電報局局長。均定爲薦任。其餘鐵路郵電各項人員之向由部由局分別酌量委派者。均著交通部查照現行職員名稱。及其員額。並委派程序。分別呈報。其應依照文官任職令分別定爲委任或薦任待遇委任待遇各員。著政事堂法制局。彙案將鐵路郵電應列簡任委任及薦任及薦委任待遇各職。加於文官任職表。呈候公布施行。此次釐定鐵路郵電各局職員任用辦法。係爲畫一用人行政起見。於各該局原有職務。初無變更。凡屬在事人員。一切辦事規程。著仍照現行事例辦理。應支月俸月薪等項。亦均照向額支給。各該員等。務各安心職守。靖共乃事。以副國家綜覈名實之至意。此令。

●內務部籌辦京師護城河工程……京師河道。年久失修。雨則漫溢爲患。旱則濁流停滯。民居侵佔。溝渠窒閉。致入國門觀光者。每引爲詬病。內務部爲整頓市政起見。特擬定收用侵佔民房。將前三門護城河工程。疏濬深廣。以資宣洩。並擬測量

29338 水平。改良溝渠。釐定管理河道辦法。呈請大總統鑒核。奉批照辦。

●京師發生籌安會……總統府政治顧問美人古德諾氏。在京發表一共和與君主論。言君主政體優於民主政體。當有參政院參政楊度孫毓筠嚴復等。暨劉師培李燮和胡瑛諸人。發起一籌安會。宣言共和國之危險。特組會研究國勢之前途。及共和之利害。以籌一國之治安云。

同 十五日

●令准財政部創辦民國實業銀行……令曰。據財政廳呈擬籌辦民國實業銀行。擬具章程。並變通營業及招股辦法。請發申令以資遵守等語。我國地大物博。天然富源。夙稱美盛。惟因人事未盡。資本不充。各種實業。尙未十分發達。該部擬創辦實業銀行。以資提倡。自屬當務之急。所擬民國實業銀行暨招股各章程。均尙妥協。其運輸保險兩業。亦係實業上必不可少之事。准該銀行酌量附設。相輔而行。所有一切應行籌備事宜。著由該部主持。妥速進行。俾裕民生而濬利源。此令。

●令各省籌設水利各機關……令曰。本年各省水災迭見。雖由雨澤過多。諒以平日水利不修。爲其本病。現在財政支絀。未遑

大舉。亟應分別緩急。預籌進行。茲據全國水利局總裁張謇。呈請責成被災各省。將業經呈准設立之水利分局。或水利委員會。河海工程測繪養成所。尅日成立。並將被災區域。繪具圖說。咨送該局暨內務農商兩部會同考核等語。洵屬切要之圖。著卽照准所議。責成各省巡按使。將上項機關。尅期籌設。並將被災情形。分別詳細咨報。以資規畫而利進行。此令。

同 十八日

●教育部呈辦全國專門以上學校成績展覽會……教育部爲審核專門以上學校之成績。并策勵其進步起見。擬在京師組織全國專門以上學校成績展覽會。定期開會。擬具簡章九條。呈請大總統鑒核。奉批照准。

●外交部呈遞美洲烏拉乖國新任總統通告就職國書

●河南火藥局失慎……河南南關火藥局。因晾曬火藥失慎。炸傷數人。當經警廳消防隊救息。

同 十九日

●特任王揖唐爲吉林巡按使……原任孟憲彝開缺進京。
●任命齊耀珊爲參政院參政。

外國大事記